

摘藻堂四庫全書薈要

經部

欽定四庫全書薈要

經部

毛詩李黃集解卷二十六

七

詳校官原任侍講臣王燕緒



欽定四庫全書薈要卷八百八十六

經部

毛詩集解卷二十六

宋 李樗黃樵 撰

蓼

音莪 五何反

刺幽王也民人勞苦孝子不得終養爾

蓼蓼者莪匪莪伊蒿哀哀父母生我劬勞蓼蓼者莪匪

我伊蔚哀哀父母生我勞瘁餅之罄矣維罍之恥鮮民

之生不如死之久矣無父何怙

音戶

無母何恃出則銜恤

入則靡至父兮生我母兮鞠我拊我畜我長我育我顧

我復我出入腹我欲報之德昊天罔極南山烈烈飄風

發發民莫不穀我獨何害南山律律飄風弗弗民莫不穀我獨不卒

李曰此言幽王之世天下之人苦於征役孝子不得以終身養爾鄭氏曰不得終養者二親病亡之時時在征役之所不得見也歐氏以爲滯泥之甚矣然觀此詩之言出則銜恤入則靡至則是言孝子行役而喪親之所作也蓼長大貌猶所謂蓼彼蕭斯也鄭氏曰蓼已蓼蓼長大我視之以爲非蓼反謂之蒿興者



喻憂思在征役中心不精識其事王氏亦同此說歐  
氏則破之以謂以文害辭故其辭以謂民人苦於勞  
役不得終養於父母見彼蓼蓼然長大者非莪即蒿  
彼草木之微者其茂盛如此由天地生育之功也思  
我之生也父母養育我亦劬勞矣而我不得終養以  
報之也其說比於鄭氏爲優然不如蘇氏之說莪蘿  
蒿也莪蘿可食而蒿不可食采莪者將以食之譬如  
生子者將賴其養也幽王之世孝子行役而遭喪哀

其父母生己之勞而終不得養如采莪者之得蒿也  
哀哀父母生我勞瘁言父母之生我亦劬勞矣今乃  
不得養其父母此所以可哀也凱風之詩以凱風喻  
父母以棘心喻其子棘心難長之木也而凱風吹之  
而至於天天亦可謂劬勞矣父母之於我如此今我  
殊無以報之其心如何哉蔚牡蔽也此章亦是上意  
疊爾雅曰小疊謂之坎注曰疊形似壺大者受一斛  
蓋餅小而疊大也罄盡也鄭氏以謂刺王不使富分

貧衆恤寡其說不類王氏皆以鉞喻民壘喻王鉞罄則爲壘之恥民罄則爲王之恥鮮毛氏以爲寡鄭氏遂箋之以謂供養日少王氏亦以爲其禍已熾則民鮮矣故謂之鮮民皆不如蘇氏以鮮爲善言民以初生爲善今也孝子行役而不得以終養父母是不如死之久矣北山之詩曰鮮我方將亦是善也善者蓋善生惡死人之常情矣舊時以生爲善今既如此不如死矣銜恤憂也言無父何所怙乎無母何所恃乎

其出則抱憂思而去其入也則不見父母如無所至  
此以傷痛之甚也父兮生我母兮鞠我此以見父母  
之恩大也父兮則生我母兮則鞠我拊我畜我長我  
育我此皆重複言其生育之恩以見其恩之厚也顧  
我復我言其周旋反復於我其恩如此出入又腹我  
腹懷抱也言受其恩如此我欲報之當何如哉故其  
心之欲與天無極也鄭氏曰我欲報父母是德昊天  
乎我心無極非也南山烈烈然寒飄風發發然而疾

皆以興王之虐政下章亦是此意鄭氏曰民之自苦  
見役視南山則烈烈然飄風發發然而寒且疾也此  
非詩人之旨律猶烈烈也弗弗猶發發也民莫不  
得以相養而我獨何害而遭此又不得以終養也故  
曰民莫不穀我獨何害我獨不卒晉王裒讀詩至哀  
哀父母生我劬勞未嘗不三復流涕門人受業者亦  
廢蓼蓼者莪之篇蓋此詩辭哀而切讀之易使人感  
動正如凱風之詩述父母劬勞之志亦無不切不讀

此詩無以見孝子之志孟東野之詩以其草比其子以陽春比父母寸草不足以報陽春之德蓋本諸此推父母之劬勞如此故其子欲報其德其心無有窮已也嘗攷於詩凱風之詩惟欲其父母能安其室之詩也小弁之詩太子見弃之詩也蓼莪孝子不得終養之詩也惟其父母不能安其室故其心思有以教之惟其不得終養父母故其哀慕如此向使不困行役不見弃於父母與夫父母能安其室則其歡欣之

情可見矣讀詩當以此類求之人惟不得事其父母  
所以哀慕不已讀是詩亦可以興發矣

大東刺亂也東國困於役而傷於財譚徒南反大夫作是

詩以告病焉

有饒

音蒙簋

音鬼飧

音孫

有捄

音蚪

棘匕

周道

如砥

其直

如矢

君

子所履

小人

所視

矐

音卷

言顧

之潛

所姦反

焉出

涕

音體

小東

大東杼柚其空糾糾葛屨可以履霜佻佻公子行彼周

行既往既來使我心疚有冽洿泉無浸穫薪契契寤歎

哀我憚人薪是穫薪尚可載也哀我憚人亦可息也東  
人之子職勞不來西人之子粲粲衣服舟人之子熊羆  
是裘私人之子百僚是試或以其酒不以其漿鞞鞞佩  
璲不以其長維天有漢監亦有光跂彼織女終日七襄  
雖則七襄不成報章睨彼牽牛不以服箱東有啓明西  
有長庚有捄天畢載施之行維南有箕不可以簸揚維  
北有斗不可以挹酒漿維南有箕載翕其舌維北有斗  
西柄之揭



李曰此詩言東方之國偏困於賦役民財殫竭故譚國大夫作詩以告病焉譚國在王室之東春秋書齊師滅譚杜元凱注曰在濟南平陵縣西南饒滿簋貌飡熟食揅長貌下章有揅天畢亦是此意棘匕以棘木爲之匕所以載鼎實也有饒簋飡有揅棘匕鄭氏以此二句爲喻古者天子施予之恩於天下厚王氏亦曰周之盛時饋諸侯之賓客以飡而饒其簋又有揅然之棘匕以載鼎實則其盛饋可知矣言其遇人

之厚如此然不如歐氏以爲足於豐饒之辭蓋當幽王之時東方之國賦役煩重民財困竭故思先王之時諸侯富饒其簋之食饒然而滿其鼎之匕掬然而長蓋其時周之所取於諸侯者其平如砥石之平其直如矢之直君子之人則履而行之小人則瞻而視之君子小人蓋指當時在位在下也正如論語所稱君子學道則愛人小人學道則易使也君子有勇而無義爲亂小人有勇而無義爲盜其曰君子小人者

皆是分別貴賤上下之稱也惟君子履此道而行小人瞻而視之今乃不然故我從今反而顧之則潛然出涕傷今之不如古也小東大東杼柚其空此章言東方之賦重至無小無大皆取於東使我杼柚其空其勢困乏則以糾糾然之葛屨屨霜而行其公子則佻佻獨行至於周之行列皆是餽送而去或往或來不勝其勞此我心所以疾病也鄭氏曰言譚人自虛竭餽送而往周人則空盡受之曾無反幣復禮之意

是使我心傷病也歐氏以此爲非詩人本義蓋此詩  
但言東人輸賦往來以是心疾殊無報幣復禮之事  
也此鄭氏所以爲衍說也有洌沕泉此章則言民困  
於賦役欲王者少寬之也易曰井洌寒泉沕泉側出  
泉也獲刈也鄭氏以爲穫落木名其說本於爾雅不  
然毛氏以爲刈契契憂苦貌憚勞也此言薪已刈矣  
以沕泉浸之則必腐敗而不可用民已勞矣以重役  
困之則必將困窮而死故譚大夫契契然而憂苦於

寢寐之中而感歎東人之劬勞也尚庶幾也言已刈  
之薪庶幾可載而歸以爲用亦猶我人亦可息之而  
使安堵也歐氏曰彼刈薪爲水浸而腐壞尚可載刈  
若斯人者勞苦而困弊則將死矣故言可以休息之  
也此說雖無害然非詩人之意但言薪尚可載民亦  
可以休息但以二事相比也東人之子此章則言東  
人之勞西人之逸也東人之子自以其職爲勞苦王  
國曾無有勞來之者西人方且盛其衣服粲粲然而

自得以至水居之人亦衣熊羆之裘言以賤人而服  
貴者之服也私人之試百僚皆言小人得志紀綱敗  
壞無復王室之舊也或以其酒歐陽公曰言當飲漿  
者今飲酒矣非也此蓋言或醉以酒或不以漿或醉  
以酒言小人之得志也或不以漿言君子之不得任  
用也璲玉也佩璲以玉爲佩也鞞鞞佩玉之貌也佩  
玉之貴者不以其才之長皆是小人用事故東方之  
賦重而不均也漢天河也言維天有漢監視於下亦

有光矣今胡爲不察此邪以言王之不明也跂然三隅之形者彼織女也七襄從旦而暮七辰一移因謂七襄襄駕也人之織也經緯往來報反成章今此織女之星名雖曰織不成報章徒有其名耳皖明星貌牽牛河鼓也服較也北服八尺曰較箱兩較間也牽牛之星名曰牽牛牽牛其用在服箱也今此牽牛之星徒有其名而不可用之於服箱也啓明爾雅曰明星謂之啓明孫炎曰明星太白也出東方高三舍今

曰明星昏出西方高三舍今曰太白觀此則啓明即  
是太白也長庚不知是何星毛氏云只是一星故後  
世亦以長庚爲太白李白字太白白之生母夢長庚  
因以爲名韓退之詩曰太白伴月蘇東坡詩亦曰長  
庚到曉猶陪月觀此則是以長庚爲太白也鄭漁仲  
乃謂啓明金星長庚水星金在日西故日將出則東  
見水在日東故日將沒則西見此詩曰東有啓明西  
有長庚則又似是二星不得渾而爲一也不如待知



天文者而問之也此蓋言啓明長庚徒有光明而不  
知監察於下也揅畢貌畢所以掩兔所謂田獵畢弋  
是也今此畢星徒有其名但施之於行列言不可用  
也箕可以簸米今南方之箕徒有箕之名而不可以  
簸揚箕星四二爲踵二爲舌踵狹舌廣故曰翕其舌  
北方之斗徒西其柄之揭然耳不可以挹酒漿許慎  
曰揭高舉貌故不可以挹酒漿也歐氏曰天雖有織  
女不能爲我織而成章雖有牽牛不能爲駕車而輸

物雖有啓明長庚不能助日爲晝俾我營作雖有天  
畢不能爲我掩捕鳥獸雖有箕不能爲我簸揚糠粃  
雖有斗不能爲我以挹酒漿其意以末章不關重役  
事故爲此說上章既言西人之子粲粲衣服舟人之  
子熊羆是裘私人之子百僚是試等句故此併言百  
官具位莫有其實故賦役之不均必自小人用事之  
所致乃若君子之所爲必以寬其賦役均其勞苦必  
不至於此也古人多以箕斗爲虛名蓋此數星皆取

人間器用之物爲有其名而無其實故詩人以爲喻而歐陽乃以爲若必刺官司失職則日月星辰名職至多宜舉其大而要者義與王官相近方可以爲善譬此則非也嘗觀唐盧仝月蝕詩歷言星辰不救月蝕之事其體制正類此詩蓋此詩之作本無意於爲文後之作者必求其法而放效之能知此則可以爲詩矣

四月大夫刺幽王也在位貪殘下國構禍怨亂並興焉

四月維夏六月徂暑先祖匪人胡寧忍予秋日淒淒百  
卉具腓亂離瘼矣爰其適歸冬日烈烈飄風發發民莫  
不穀我獨何害山有嘉卉侯栗侯梅廢爲殘賊莫知其  
尤相彼泉水載清載濁我日構禍曷云能穀滔滔江漢  
南國之紀盡瘁以仕寧莫我有匪鶉匪鳶翰飛戾天匪  
鱣匪鮪潛逃于淵山有薜薇隰有杞桋君子作歌維以  
告哀

李曰徂往也鄭氏曰四月立夏矣至六月乃始盛暑

興人爲惡亦有漸非一朝一夕非也詩言徂者乃暑  
既往非是方盛也王氏以爲四月維夏而六月徂暑  
則陽運而往矣往者屈也來者伸也陽屈而陰信則  
是由小人之道長此其所以亂也此說雖無害然亦  
不必泥於君子小人之說蓋此詩三章頗有次第一  
章則言夏時二章則言秋日三章則言冬日四月之  
時陽氣方盛至六月而暑往矣是其萬物微衰之漸  
其後遂爲冬則其衰甚矣以喻幽王之政暴虐愈甚

也四月維夏六月徂暑乃夏之四月六月也若周之時則以夏之二月爲夏而周之六月乃夏之四月也不得爲徂暑周時又用夏朔者蓋周雖自有正朔而夏之正朔亦不廢也如周官言正月之吉始和是周之正月也正歲則贊教法如初此夏之二月如食齊視春時羹齊視夏時醬齊視秋時飲齊視冬時此皆夏之時也食齊視春時食宜溫也若用周之春則是十一月十二月也豈得爲溫乎羹齊視夏時羹宜熱

也若用周之夏則是二月三月也豈得爲熱乎以至  
秋也冬也亦然以此觀之詩人之言有指周時者也  
有指夏時者也不可泥也先祖匪人胡寧忍予此兩  
句頗難說諸儒之說固多未必是詩人之意一云上  
之人以我先祖爲非人乎胡爲忍加殘虐於我也苟  
以我先祖爲人則當以人類待我不當視若土芥而  
無有不忍人之心正猶何草不黃之詩刺幽王之視  
民如禽獸故其詩亦曰哀我征夫獨爲匪民皆言幽

王不以人視人也王肅曰征役過時曠廢其祭祀我先祖獨匪人乎王者何爲忍不憂恤使我不得循子道此詩固無大夫祭祀之事不得以此爲說鄭氏曰我先祖非人乎人則當知患難何爲使我當此亂世乎此說雖是然亦未之盡歐氏因其說之未盡以爲作詩之大夫斥其先祖此失之大者也詩人之意決不如此孟子曰說詩者不以文害辭不以辭害志以意逆志是爲得之此兩句當以意求之儻不以意求



之則是先祖匪人胡寧忍予乃是斥先祖也亦猶所  
謂不自我先不自我後若以是求之則必以謂貽禍  
於父母子孫爲人而斥其先祖貽其禍於父母子孫  
豈人也哉豈夫子所取之詩哉其曰先祖匪人胡寧  
忍予者言先祖非人乎胡爲使我至於此也其意則  
謂先祖亦人也必不使我至於此也然則我之取禍  
自何來哉若泥於先祖匪人則是斥其先祖也子細  
觀之謂先祖乃是我之此禍非先祖之罪也此豈

斥其先祖哉秋日淒淒此章遂言貪殘之政下民困  
病如秋日淒淒然而百草俱病也亂離瘼矣爰其適  
歸此傷離散以爲亂者也家語以爰爲奚詩人本意  
未必不如是也沈內翰曰書之闕誤有可見於他書  
如詩言天天是椓後漢蔡邕言天天是椓與速速方  
穀爲對又彼徂矣岐有夷之行朱浮傳作彼徂矣岐  
有夷人行愚亦從此家語奚其適歸可以見其詩之  
闕誤言下民罹此亂離之病何所適歸乎冬日烈烈

飄風發發言幽王之虐政愈甚如冬日烈烈然而甚  
虐飄風發發然而疾則其暴虐甚矣民莫不穀我獨  
何害民莫不得養其父母我獨何爲遭此禍也幽王  
之時天下莫不被其禍乃云民莫不穀者此特據父  
母之家民莫不得以養其父母而我獨不能蓋傷已  
遭亂之甚也山有嘉卉侯栗侯梅此章言貪殘也諸  
家徒見詩以栗梅爲嘉卉遂以爲生於栗梅之下據  
詩言侯栗侯梅者侯維也言山有嘉卉是栗是梅也

豈得爲生於栗梅之下哉且如考工記言天下之大  
獸五脂者膏者羸者羽者鱗者正猶此詩所謂嘉卉  
者也若泥於嘉卉而求之是以物色而求馬也梅栗  
美草今也廢爲殘賊曾莫知其所以得罪之由蓋民  
者國之本也今君忍而殘虐之則清濁不可常矣幽  
王失道諸侯放恣天下治亂莫能相一亦猶是也蘇  
氏之意蓋以此章連下章說詩人本義必不如是此  
言相彼泉水一則清一則濁水尚清者而今我構此

橫禍無時而善則是無有清者也滔滔大貌書曰浩  
浩浩天言江漢甚大爲國之綱紀固可以納衆水今  
幽王之時既無綱紀故我盡瘁以仕而莫我有則是  
不能納天下之善者也鶉注曰鵬也說文曰鵩雕也  
其字從敦若以爲鶉鵩之鶉則無戾天之理惟鵬乃  
戾天爾雅曰鵬能食草似鷹而大黑色俗呼卑鵬一  
名鶉鳥其飛上薄雲漢此章蓋言下民欲深藏高飛  
以逃難不可得也言我匪鶉也匪鶉也安能飛至於

天匪鱸也匪鮪也安能深入於淵此言難之不可逃也山有蕨薇此章蓋言草木之生於山隰得其所托故作此詩以告哀而已杞枸杞也楸赤棘也蘇氏曰大夫有退而食蕨薇甘杞楸以免於禍者作此詩以告其哀憐天下之志非以爲其身也蘇氏之意蓋連上文然亦不必如此也

北山大夫刺幽王也役使不均已勞於從事而不得養其父母焉

陟彼北山言采其杞偕偕士子朝夕從事王事靡盬憂  
我父母溥天之下莫非王土率土之濱莫非王臣大夫  
不均我從事獨賢四牡彭彭王事傍傍嘉我未老鮮我  
方將旅力方剛經營四方或燕燕居息或盡瘁事國或  
息偃在牀或不已于行或不知叫號或慘慘劬勞或棲  
遲偃仰或王事鞅掌或湛樂飲酒或慘慘畏咎或出入  
風議或靡事不爲

李曰言幽王之時役使臣下不均北山之大夫獨勞

於從事不得休息其他大夫未必爾北山之大夫所以懷怨不得養其父母而作此詩也昔晉周處以強毅爲朝廷所惡及使隸夏侯駿西征孫秀知其將死謂之曰卿有老母可以此辭也處曰忠孝之道安得兩全既辭親事君父母安得而子乎今日是我死所也蓋既已事君則不得顧其父母既以爲國則不知顧其家所以不敢以家事辭王事人臣之大義也若周處者可謂盡事君之節矣蓋處之於父母非不愛



也義所當然也而北山之大夫勞於王事乃復念以  
不得養其父母何哉人嘗以謂北山之大夫不如北  
門之忠臣又不如汝墳殷其雷之婦人汝墳之婦人  
能勉其夫以正而曰魴魚涸尾王室如燬父母孔邇  
殷其雷之婦人乃能勸其夫以義而曰振振君子歸  
哉歸哉婦人之無知乃能不以王事爲怨亦可謂難  
矣至於北門之詩則曰室人交徧謫我已焉哉天實  
爲之謂之何哉室人交徧謫我則其忠臣已不如殷

其雷汝墳之婦人矣然其臣乃能歸之於天不以爲怨若北山之大夫則已爲怨也此其所以爲變風變雅也北山大夫不當怨而怨夫子不刪之者蓋所以刺幽王也孔子曰公則說人主苟有均平之心則雖征役之重不以爲怨若有不均之心則雖征役未甚勞苦而人亦將怨矣觀幽王之所爲則甚不均矣大東之詩則賦役亦不均有粲粲衣服者有葛屨履霜者北山之詩則役使不均有偃息在牀者有不已於

行者以此二詩觀之則幽王之政無一得其平矣則天下安得而悅服哉此其所以可刺也杞枸杞也季氏昭十二年有圃生之杞杜元凱注曰世所謂枸杞者正與此杞同鄭氏曰喻已行役不得其事此說是也此詩所言陟彼北山言采其杞因見杞菜之生感時物之變傷行役之久非有其實也王氏曰陟彼北山適險而之幽也亦非也此但言往北山采杞不以幽險爲說偕偕強壯也說文曰強也因舉此詩言其

強壯士子朝夕從事無有休息王事則無不堅固矣  
然而憂我父母不得養之也正如所謂劉氏安晁氏  
危矣之意同溥大也言天下之大無非王土循率土  
之濱誰非王臣何獨任我也今大夫不均以勞苦之  
事獨以我從事而推以爲賢所謂賢者又如下文嘉  
我未老鮮我方將之意同孔氏曰作詩者言王道之  
衰傷境界之削則云蹙國百里蹙蹙靡所騁恨其有  
人衆而不使即以廣大言之所怨情異故設辭不同

此說甚善蓋卽南山瞻仰與此詩皆是幽王之詩一則言其地之廣一則言其地之削當以意而逆志也亦如言文王之地言其廣則曰三分天下有其二以服事商言其地狹則曰由百里起蓋方言其興王業不在地之廣而在其德則曰由百里起方言其形勢之強而不失其人臣之節則曰三分天下有其二以服事商其言各有當也四牡彭彭然不得休息王事傍傍然不得已蓋王之意善我之未老善我之方壯

以我之力方且剛強可以經營四方而使之至於此極也將壯也旅毛氏曰衆也鄭氏曰王謂此事衆之氣力方盛乎此說不分明按此詩曰旅力方剛桑柔之詩曰靡有旅力書秦誓曰旅力既愆若桑柔之詩以謂衆之氣力也如秦誓所謂番番良士指此良士既雖無力亦不得以爲衆也旅亦訓陳左氏庭實旅百杜元凱注以旅訓陳此旅力亦是陳力也自此以下皆是言役使不均有燕燕然而居息者有盡力以

事國者有偃息而在牀者有不止於行驅馳於道路者有或不知上有徵發呼召者有或慘慘然而劬勞者有棲遲於家而偃仰者有或以王事之勞鞅掌而失容者或有惟湛逸樂而飲酒者或慘慘而畏獲罪者或有出入放恣議量時政者有無事不爲者其不均如此之甚矣夫坐而論道謂之三公作而行事謂之士大夫三公之與大夫則有勞逸之殊其勢然也孰敢懷怨上之心哉今也同是大夫而不均如此所

以北山致大夫之怨也

無將大車大夫悔將小人也

無將大車祇自塵兮無思百憂祇自疚兮無將大車維  
塵冥冥無思百憂不出于頰無將大車維塵雍兮無思  
百憂祇自重兮

李曰此詩言幽王之時小人在朝而君子與之共事  
故悔之也鄭氏以無將大車爲取喻以無思百憂爲  
非取喻當從王蘇之說鄭氏曰百憂者衆小事之憂



也此說不甚明白大車蘇氏謂牛車也言不可將扶  
大車苟將大車則塵汚之矣不可思百憂苟思百憂  
則禍及之矣亦猶小人不可與之共事苟與之共事  
則難及其身不可逃也下二章皆此意頌光也言不  
出於光明而致幽暗也重累也王氏曰車君子之所  
乘而非君子之所將將之則祇自塵而已小人者君  
子乘而節之使退聽而已斯可也乃下而將之則是  
將大車之類也亦不必如此說蓋王氏皆以三章爲

取喻其說則是而其爲說似未可行也

小明大夫悔仕於亂世也

明明上天照臨下土我征徂西至于玆野二月初吉載  
離寒暑心之憂矣其毒大苦念彼共人涕零如雨豈不  
懷歸畏此罪罟昔我往矣日月方除曷云其還歲聿云  
莫念我獨兮我事孔庶心之憂矣憚我不暇念彼共人  
眈眈懷顧豈不懷歸畏此譴怒昔我往矣日月方奧曷  
云其還政事愈蹙歲聿云莫采蕭穫菽心之憂矣自詒

伊戚念彼共人興言出宿豈不懷歸畏此反覆嗟爾君子無恒安處靖共爾位正直是與神之聽之式穀以女嗟爾君子無恒安息靖共爾位好是正直神之聽之介爾景福

李曰鄭氏以爲名篇曰小明者言幽王日小其明損其政事以至於亂蓋鄭氏徒見大明者文王之詩也故以謂文王能大其明幽王之時謂之小明故以謂幽王小其明然以詩求之詩之所謂明明上天但言

上天之明也上天之明豈有小大邪在小雅則謂之  
小明在大雅則謂之大明鄭氏於小旻小宛皆求其  
義小旻則以爲所刺列於十月之交雨無正爲小小  
宛亦以政教爲小皆不求其所以名篇之意而泥之  
於小大之字故其說至於如是也明明上天王氏言  
幽王作民主而悖天道無明德以察治故世亂此說  
不然所謂明明上天照臨下土言天之明無所不察  
今也大夫仕於亂世而乃勞苦是何上天不見察邪

我征之往於西方至於遠荒之地乃以二月朔日始  
行今乃更歷寒暑尚未得歸至于苑野言其遠也二  
月初言其久也以行役之遠所歷之久天胡不爲  
見察邪鄭氏乃以大夫爲牧伯之大夫然小明之大  
夫乃周之大夫也何以知其爲牧伯之大夫邪孔氏  
云牧伯部領一州大率二百一十國其事繁多然是  
時大夫其行役也亦有事繁多者何獨牧伯邪心之  
憂矣其毒大苦言其思之大苦也念彼共人蘇氏以

爲思得共德之人而事也不如陳少南以共人爲大  
夫之友言大夫始仕之時必有友人諫之而大夫不  
聽既仕而復悔之故念其昔日之友而涕零如雨也  
我豈不懷歸又恐入於罪網也方其未仕不仕可也  
既仕則欲歸而不得蓋仕於亂世者多如此昔我往  
矣日月方除王氏以爲幽王之大夫以周之九月十  
月之間出使以周二月至于芑野日月方除者周以  
夏之十一月爲正則以夏之十月爲除方除則九月

之間也楊龜山破其說鄭氏謂四月陽極而陰生故陽有除之義也猶十月陰極而謂之陽月也若從王氏之說謂周以夏之十一月爲正則十月爲除歲莫而往歲莫而還不足以爲久也當從鄭氏之說蓋其說本於爾雅也昔我往而至於芄野以四月之時自謂何時而得歸乎今則歲又莫爾念我獨兮亦猶我從事獨賢也我事孔庶亦猶或靡事不爲也心之憂矣勞我不復有暇也念彼昔者之友睠睠然懷顧之

非不懷歸畏取怒於當時也昔我往矣日月方奧奧  
煖也謂四月之時也四月之時方往謂何時而得歸  
乎而政事愈蹙今歲聿云莫正采蕭穫菽之時也心  
之憂矣我仕亂世而自遺戚也念彼昔日之友興言  
出宿鄭氏以謂夜卧而起宿於外憂不能宿於內是  
也豈不懷歸畏此反覆反覆不常之意非不懷歸畏  
得其罪也嗟爾君子無常安處鄭氏謂其友未仕者  
人之居無常安之處謂當安安而能遷此說不然蘇



氏以爲久勞於外又有久安處於內者矣言我憂勞  
於外在內之君子無常安之處也靖共爾位所與之  
人皆正直之人然後神之聽之以福汝爾苟貪於  
安處不靖共爾位則神從禍爾矣以見憂勞者在外  
告於內者故出是言也

鼓鍾刺幽王也

鼓鍾將將淮水湯湯憂心且傷淑人君子懷允不忘鼓  
鍾喑喑淮水涓涓憂心且悲淑人君子其德不回鼓鍾

伐磬淮有三洲憂心且妯淑人君子其德不猶鼓鍾欽  
欽鼓瑟鼓琴笙磬同音以雅以南以籥不僭

李曰鼓鍾之詩諸家多以爲作樂於淮水之上歐陽  
公以爲不然考詩書史記皆無幽王東巡之事何由  
遠至淮上而作樂不知此詩安得爲刺幽王也書曰  
徐夷並興蓋自成王時徐戎及淮夷已皆不爲周臣  
故於此詩之義遂闕而不言惟張橫渠以爲淮水爲  
害幽王不恤作樂不止故詩人言憂心且傷作詩之

人傷之也此說得之淮水湯湯諸家多以湯湯爲溢  
至於湑湑則不溢矣淮水有洲則又勝於湑湑矣若  
以張橫渠之說求之湯湯乃是泛濫書曰湯湯洪水  
方割則湯湯之濫無疑也湑湑亦湯湯也三洲言水  
之浸及於三洲也此言泛濫之狀伐鼙大鼓也憂心  
且妯娒憂也此作詩之人所以憂之也方幽王之作  
樂所以爲樂而人乃以爲憂者是非所樂而樂之淑  
人君子懷允不忘言今我思古之善人君子念而信

之未嘗忘也古者未嘗不爲樂則與民同樂今民以爲憂而王乃自以爲樂其可乎淑人君子其德不回言古之善人君子其德不如是之回邪也其德不猶言其德不若是也至於末章則言所以爲樂非不美也特以其所作非其時爾蘇黃門以謂將作樂則鼓鍾所謂金奏也既鼓鍾欽欽於是乃鼓瑟與琴笙磬皆相和以至於二雅二南播之以籥皆不僭差蘇氏沈存中皆以爲二南鄭氏則以爲四夷之樂誤矣書

曰泝水警予泝水者洪水也以堯之聖德可謂至矣  
遭洪水猶有警戒之心爲幽王者較之堯帝固甚相  
遠則其警戒之心當何如邪縱不能懷警戒之心則  
曷爲作樂哉方民當昏墊之時幾不聊生而幽王乃  
安然作樂是可忍也孰不可忍也憂民之憂者民亦  
憂其憂樂民之樂者民亦樂其樂民方以爲憂而幽  
王且以爲樂斯民聞鍾鼓且蹙頞而相告曰吾王之  
好樂甚夫何使我至於此極也此樂也祇其所以爲

憂也唐太宗嘗曰夫聲之所感皆因人之哀樂將亡之政其民困故聞以悲今玉樹後庭花伴侶之曲尚存爲公奏之知必不悲魏徵曰樂在人和不在音也夫玉樹後庭花伴侶之曲非不愁也然作於太宗之時則未必悲二雅之南非不美也然作於幽王之時則不足樂以此見樂之作也不繫於聲音之間惟繫人心如何耳

李迂仲黃實夫毛詩集解卷二十六

欽定四庫全書薈要卷八百八十七

經部

毛詩集解卷二十七

宋

李樗黃樞

撰

楚茨刺幽王也政煩賦重田萊多荒饑饉降喪民卒流亡祭祀不饗故君子思古焉

楚楚者茨言抽其棘自昔何為我藝黍稷我黍與與我稷翼翼我倉既盈我庾維億以為酒食以享以祀以妥以侑以介景福濟濟跄跄絜爾牛羊以往烝嘗或剥或亨或肆或將祀祭于祊祀事孔明先祖是皇神保是饗

孝孫有慶報以介福萬壽無疆執爨踏踏為俎孔碩或  
燔或炙君婦莫莫為豆孔庶為賓為客獻醕交錯禮儀  
卒度笑語卒獲神保是格報以介福萬壽攸酢我孔熯  
矣式禮莫愆工祝致告徂賚孝孫苾芬孝祀神嗜飲食  
卜爾百福如幾如式既齊既稷既匡既勅永錫爾極時  
萬時億禮儀既備鐘鼓既戒孝孫徂位工祝致告神具  
醉止皇尸載起鼓鐘送尸神保聿歸諸宰君婦廢徹不  
遲諸父兄弟備言燕私樂具入奏以綏後祿爾穀既將



莫怨具慶既醉既飽小大稽首神嗜飲食使君壽考孔惠孔時維其盡之子子孫孫勿替引之

李曰此詩言幽王政令之煩賦歛之重至於田萊多荒而又天降饑饉使民皆流散逃亡故祭祀神弗歆饗此言其序也惟其政煩賦重傷民之財奪民之力民不得從事於田畝此田萊所以為多荒田萊多荒則是饑饉之災降喪民無所食遂流亡散徙於四方此民所以流亡民既流亡則其祭祀而神亦不歆饗

古者先成民而後致力於神人民者鬼神之所依也  
今民人流亡則是神失其依矣雖豐其粢盛亦何補  
哉故祭祀不饗也萊者廢田也廢田謂之多荒者周  
官遂人田百畝萊五十畝萊者必欲治之今萊不治  
遂致於多荒此詩所以刺之也楚楚者茨楚楚茨棘  
貌抽除也鄭氏云茨蒺藜也茨言楚楚棘言抽互辭  
也蓋言茨之楚楚則亦知棘之楚楚矣言棘抽者則  
亦知茨之抽矣此章言民之去草芟夷蘊崇之而百

穀以茂百穀以茂則可以寘之倉廩以供祭祀也王氏則以為傷今之意言楚楚者茨則茨生衆也王氏之意以為傷今而作然觀楚楚茨一篇乃是思古人之意如信南山甫田大田全篇盡是思古人之詩全無一句及於刺幽王楚茨之詩亦然也然古人之所以去草者果何為哉所以藝黍稷也惟其既去草以藝黍稷故其黍則與與其稷則翼翼豐茂盛大以致豐年之祥而倉庾則又充盈露積曰庾國語云野有庾

積注云庾露積禾也於倉言盈於庾言億亦是盈辭也以為酒食享祀於神祇又迎尸於室以拜安之乃設食以進為尸嫌不飽祝以主人之辭侑勸之惟其有以安之又有以勸之後能助其大福也此章於豐年詩大抵相類豐年多黍多稌亦有高廩萬億及秭為酒為醴烝畀祖妣以洽百禮即此所謂以為酒食以享以祀以妥以侑是也降福孔皆即此詩以介景福是也豐年全篇只是楚茨一章自可以備見也古者

先成民而後致力於神故奉牲以告曰博碩肥腍謂民力之普存也謂其畜碩大蕃滋也謂其不疾疫蟲也謂其備腍咸有也奉盛以告曰潔粢豐盛謂其三時不害而民和年豐也奉酒醴以告曰嘉栗旨酒謂其上下皆有嘉德而無違心也所謂馨香無譌慝也謂其三時不害為時和歲豐則見倉廩之實可以為酒食以饗祀於神此古之時如此至幽王之時則不然矣自此以下皆言祭祀之事濟濟蹌蹌則言其禮

儀之備絜爾牛羊則言其牲牷之備濟濟蹌蹌則內  
備禮絜爾牛羊則外備物內備禮外備物其誠可謂  
至矣不可以有加矣故以之共烝嘗之祭有解剥其  
皮者有煮熟之者有肆其骨體於俎者有奉將以進  
之者祝祭于祊祊門內也孝子不知神之所在或在  
此或在彼故使祝求之於門內之旁其祀事則下治  
矣孔明下治也惟其祀事孔明故先祖是大神必安  
而饗之報以大福使孝子饗其慶至於萬年無窮也

執爨饗饗廩爨也饗爨在門東南北上廩爨在饗爨  
之北是二爨者也踏踏有容也俎者從獻之俎也方  
其既獻酒矣於是以燔炙而置之於俎其為俎也則  
博大其俎之中又有燔炙二者燔燔肉也炙炙肝也  
孔氏云燔者火燒之名炙者遠火之稱以難熟者近  
火易熟者遠之故肝炙而肉燔也君婦謂后也莫莫  
言清靜而敬至也凡祭祀后夫人主共籩豆其籩豆  
則甚庶然所設之物亦猶在於祭祀而祭祀之事以

將為燕飲故曰為賓為客其大待客也始主人酌賓  
為獻賓既酢主人主人必自飲酌賓曰醕自旅而爵  
其禮交錯如此而禮儀終合於法度其笑語至於卒  
不亂宜乎神安而饗之報以大福萬壽至於攸酢也  
酢報也楚茨詩言神保是饗孝孫有慶報以介福萬  
壽無疆又言神保是格報以介福萬壽攸酢其辭重  
複如此亦猶天保之詩言福祿無不重複蓋以見受  
福之多也燠毛氏以為敬不如蘇氏以為竭言我行



禮以筋力既竭然其禮樂未嘗或愆此以見周旋中  
禮也工者善其事曰工蓋善於為祝故告於主人也  
告於主人使受嘏既而以嘏之物往予主人孝孫也  
爾之孝孫主人有苾芬馨香之祀故鬼神嗜飲食今  
所以予汝百種之福其來如有期矣多少如有法矣  
幾期也式法也其福所以如此之多也則奉其祭祀  
齊整稷疾誠正慎固錫爾中和之福至於時萬時億  
之多也禮儀既備此章則又言送神之意上章則言

祭祀之意今此則言送神也言禮儀既畢備矣鐘鼓之聲既告戒矣擊鐘鼓以告戒言祭畢也孝孫往位堂下西面位祝於是致孝孫之意又從而告之以神將歸也神既皆醉而尸則起乃鳴鐘鼓而送尸以其安然而歸於天也尸已出矣而諸宰及君婦徹其俎豆皆不遲祭祀畢歸賓客之俎其諸父兄弟留之以備燕飲所以盡親親之義也樂具入奏此章則言燕兄弟也其燕兄弟而具樂入奏以安後祿鄭氏謂後

日之福祿不如蘇氏以謂祭之餘福也爾之穀則將  
行矣其同姓之人莫有怨者言皆相慶既醉於酒又  
飽於德其小大長幼皆稽首而相慶以謂今日之祭  
神嗜其飲食使君得壽考之福以君能順其禮甚得  
其時至矣盡矣不可以有加矣惟願君之子孫世世  
長行而勿替也楚茨五章皆以祭祀之事惟一章則  
獨言藝黍稷以供祭祀蓋一章言其大槩二章而下  
則析而言之詩之體如此多矣

信南山刺幽王也不能修成王之業疆理天下以奉禹  
功故君子思古焉

信彼南山維禹甸之昀昀原隰曾孫田之我疆我理南  
東其畝上天同雲雨雪雰雰益之以霡霂既優既渥既  
霑既足生我百穀疆場翼翼黍稷彧彧曾孫之穡以為  
酒食畀我尸賓壽考萬年中田有廬疆場有瓜是剥是  
蒞獻之皇祖曾孫壽考受天之祜祭以清酒從以騂牡  
享于祖考執其鸞刀以啟其毛取其血膋是烝是享苾

苾芬芬祀事孔明先祖是皇報以介福萬壽無疆

李曰此言成王之時能疆理天下以繼禹功幽王之  
時則不能繼其祖之業所以思古而傷今不然也孟  
子曰仁政必自經界始經界不正井地不均穀祿不  
平是故暴君汚吏必慢其經界經界既正分田制祿  
可坐而定惟成王之為政獨以經界為本故疆理天  
下見於詩見於周官見於詩則如信南山甫田大田  
是也見於周官則如大司徒井牧田野是也至於幽

王之時田萊既多荒矣又豈能疆理天下哉是所謂  
暴君汚吏慢其經界者也此信南山詩所以作也信  
彼南山甸丘甸也信乎南山之地乃禹所以致丘甸  
之法也夫禹平水土之後其功見於天下者豈獨一  
南山而已哉而曰信彼南山維禹甸之者孔氏云作  
者指一處而表之其意通及天下也故序言疆理天  
下此說是也韓奕詩亦曰奕奕梁山維禹甸之禹所  
甸豈一梁山而已哉蓋方言韓之地故言梁山謂之

信南山者亦如是也四井為邑四邑為丘四丘為甸  
甸方八里六十四井也然井田之法實見於周而乃  
以為丘甸之法已見於夏后氏之世何也孔氏云禮  
運言大道既隱繼而曰以立田里則是三王之初而  
有井田田里之法也論語說禹盡力乎溝洫與匠人  
井間有溝成間有洫同也益稷濬畎澮距川與匠人  
同間有澮專達於川同也是丘甸之法禹之所為左  
傳言少康之在虞思有田一成有衆一旅則是十里

為成非周之賦法也而老蘇亦以為井田之興其始  
於唐虞之世則周之世無以成井田唐虞啟之以至  
夏商稍稍葺治至周而大備蘇氏之說與孔氏合觀  
孟子曰夏后氏五十而貢商人七十而助周人百畝  
而徹其實皆什一也以貢助徹皆本於什一若非丘  
甸之法何以能行什一之法也故於丘甸之法已見  
於夏后氏之時也惟禹成丘甸之法而成王能繼禹  
之功故昉原隰曾孫田之曾孫指成王我疆言畫



其疆界也我里言分其土宜也畫其疆界則如周官所謂四丘為甸是也分其土宜則如周官所謂其穀宜黍之類是也南東其畝言或東或南順田畝之宜也左傳成公二年曰先王疆理天下物土之宜故舉詩曰我疆我理南東其畝所謂南東其畝者亦猶或縱或橫皆順其土之宜上天同雲此章又言天之潤澤如此在上天同起雲故雨雪紛紛然而積天既下雪又益之以小雨說文曰霖霖小雨也既雨雪矣又

雨之既已饒渥既已霑潤陸農師曰三農之事雪則  
欲盛而徧故於雪言霏霏雨欲小而潤故於雨言霏  
霏雨雪霏霏言雪之盛也益以霏霏言雨之小也老  
杜亦云潤物細無聲亦是小雨也農師之言既得之  
矣而既優既渥又以為雪既霑既足又以為雪此則  
不當無分別也第一章所言地利也二章所言天時  
也地既利矣天既時矣此所以為豐年之報而生我  
百穀也其疆場之上翼翼然讓畔黍稷則或或然而

茂盛成王則鯁而收之為酒食以祭祀以燕賓客而  
獲壽考之報也中田有廬古者宅在都邑田於外野  
農時則出而在廬秋冬則去春夏在廬所以暫居於  
此也疆場之上則種瓜焉此見地無遺利矣又入其  
稅天子剝削淹漬以為菹貴四時之異物於是以此  
瓜獻之於皇祖故成王壽考受天之福也夫成王之  
時非獨黍稷之茂而疆場有瓜則萬物皆以成熟況  
於黍稷乎至幽王之時田萊多荒黍稷尚且不熟況

於瓜者乎但以疆場有瓜求之於是以見古今之異也清謂玄酒也酒鬱鬯五齊三酒也祭禮先以鬱鬯降神然後迎牲以獻祖考謂之騂牡者周人尚赤故也鷩刀刀下有鈴也刀下有鈴則其聲中節郊特牲云割刀之用而鷩刀之貴貴其義也聲和而後斷也是中節也以啟其毛取其血骨郊特牲曰血毛告幽全之物貴純之道也楚國語亦曰毛以示物執其鷩刀以開其毛取其血骨以燒之血以告殺骨以升臭

膾脂膏也燒其膾膏以升其臭氣蓋以此脂膏合之  
黍稷置之蕭乃以火燒之合其馨香之氣是升臭也  
惟其祭祀既盡其誠故於此而進獻之所以獻之物  
則芬芬苾苾然而香遠聞祀事於是乎下治先祖則  
從而皇大之故報以大福萬壽無疆也楚茨之詩先  
言我黍與與我稷翼翼我倉既盈我庾維億自是乃  
言祭祀之事其後則繼之以神嗜飲食使君壽考今  
此信南山先既言疆場翼翼黍稷彧彧於是言祭祀

之事其終亦言先祖是皇報以介福萬壽無疆以至甫田大田其始皆言曾孫勸農之道甚篤其後則言祭祀之事其終曰報以景福萬壽無疆是數詩辭雖不同其意一也是皆言福祿之報本於祭祀而祭祀又本於黍稷也張文潛曰受莫大之福而其君有安寧壽考之樂此天下之至美極治之際也而其本出於倉廩之盈原隰之治田廬之修雨雪之時而後乃及於祭祀禮樂之事也蓋衣食不足於下則禮樂不

備於上禮樂廢則亂隨之而起惟田事備則衣食豐  
衣食豐而禮樂備禮樂備而和平興和平興而人君  
有福祿壽考之盛此詩人深探其本要其終而言之  
序如此也此言盡矣

甫田之什詁訓傳第二十一

甫田刺幽王也君子傷今而思古焉

倬彼甫田歲取十千我取其陳食我農人自古有年今  
適南畝或耘或耔黍稷薿薿攸介攸止烝我髦士以我

齊明與我犧羊以社以方我田既臧農夫之慶琴瑟擊鼓以御田祖以祈甘雨以介我稷黍以穀我士女曾孫來止以其婦子饁彼南畝田畯至喜攘其左右嘗其旨否禾易長畝終善且有曾孫不怒農夫克敏曾孫之稼如茨如梁曾孫之庾如坻如京乃求千斯倉乃求萬斯箱黍稷稻粱農夫之慶報以介福萬壽無疆

李曰此詩所以為君子傷今而思古則是此詩之中幽王皆不能然也如曰我取其陳食我農人刺幽王



之世民人困乏必不能然也如禾易長畝終善且有  
刺幽王之世田萊多荒必不能然也以此觀之則此  
詩一篇之中皆如是也倬明也甫大也鄭氏曰甫之  
言丈夫也不如毛氏甫田謂天下田也言明乎彼大  
古之時天下之田則一歲而取十千之數也其曰倬  
彼甫田正猶所謂信彼南山也十千毛氏曰言多也  
鄭氏則以謂一成之數毛氏之意謂當言田畝之賦  
多田畝之賦既言十千則其他可知也不如鄭氏之

言為有依據九夫為井井稅一夫其田百畝井十為  
通通稅十夫其田千畝通十為成成方十里成稅百  
夫其田萬畝此所謂十千也按漢書食貨志曰六尺  
為步步百為畝畝百為夫夫三為屋屋三為井井方  
一里是為九夫八家共之各授私田百畝公田十畝  
是為八十畝餘二十畝以為廬舍信如此說則是一  
成之內歲之所取者八千畝也安得有十千也故孔  
氏破其說以為井九百畝其中為公田則中央百畝

共為公田不得家取十畝也又言八家皆私百畝則百畝皆屬公矣何得復以二十畝為廬舍也言同養公田是八家共理公事何得家分十畝自治之也若家取十畝各自治之安得謂之同養也若二十畝為廬舍則家別二畝半亦入私矣家別私有百二畝半何得為八家皆私百畝也孔氏此說甚善我取其陳毛氏曰尊者食新農夫食陳如此說則是古之農者皆食陳矣鄭氏曰倉廩有餘民得賒貰取食之所以

紓官之蓄滯亦使民愛存新穀此與毛氏之說亦不甚相遠惟蘇氏曰一成之田而歲取萬畝以為國用又將其陳積以時發歛以助農夫之困乏此說為善漢志曰太倉之粟陳陳相因若無道之世倉廩困乏安得陳陳故我取其陳粟以食農人乃自古豐年之法也惟我取其陳食我農人為自古有豐年之法故我今適南畝視其耘耔而黍稷至於薿薿然而盛耘除草也耔糞本也攸介攸止毛氏曰治田得穀俊

士以進漢食貨志曰春令民畢出在野冬則畢入於  
邑冬民既入則是餘子亦在於序室八歲入小學學  
六甲五方書計之事始知室家長幼之節十五入大  
學學先聖禮樂而知朝廷君臣之禮其有秀異者移  
鄉學于庠序庠序之異者移國學于少學諸侯歲貢  
少學之異者于天子學于大學命曰造士行同能偶  
則別之以射然後爵命焉此先王制士處民富而教  
之之大略也鄭氏之說蓋本於此然不如蘇氏之說

曰是以親適南畝而視其耘耔助其勤力止其怠惰  
進其髦俊庶幾有年以遵古之成法所謂進其髦俊  
者如漢寵力田之類歟此說為善以我齊明毛氏曰  
實器曰齊則以此齊為齋字讀音容王氏曰以我齊明  
內致其志也則以齊為齋字讀仄寔按禮記曰齊者

精明之志也則齊明亦可以為齊戒然齊明二字對  
犧羊為文則當從毛氏之說以為實器曰齊也蓋言  
以我明潔之齊與夫純色之羊以祭社稷以祭四方

以報之也蓋上章既言豐年之事故此章則修其告  
戒之禮也我田既臧言我田既善矣故於孟冬之日  
其農夫之人各受其賜慶賜也既而於孟春既郊而  
始耕則又擊其琴瑟與鼓以迎田祖先嗇之神而祭  
之所以求甘雨以助我黍稷以養我士女也穀養也  
蓋圖終則有始也周官曰凡祈年於田祖吹豳雅擊  
土鼓以樂田畯即此是矣曾孫來止王氏曰勞來曰  
來曾孫以婦子饁彼南畝而勞其來此孟子所謂省

耕是也田畯至喜於是田畯之官至而喜之據却其  
左右嘗其旨否民知成王之勤於農事則盡力於治  
禾徧竟畝中終善且有於是成王不怒其農夫之克  
敏也如此成王以萬乘之尊而親臨於畎畝之中生  
於深宮而知稼穡之艱難田畯安得不奉成王之意  
乎田畯既已如此民安得不奉田畯之意乎曾孫之  
稼稼禾也謂有藁者也庾露積穀也茨積也梁車梁  
也坻水中之高地也京高丘也言成王所得之稼則



如屋茨如車梁所得之庾則如水中之坻如高丘言其多如此鄭氏曰上古之稅法近者納穗遠者納粟米曾孫之稼如茨如梁此近者納總也曾孫之庾如坻如京此遠者納粟米也惟其禾之多如此故乃求千倉以處之求萬車以載之箱車也既有黍稷又有稻粱言其無所不有也故於孟冬之日農夫之人各受其慶其將何以報之哉惟報之以介福祝之以萬壽無有疆竟而已

大田刺幽王也言矜寡不能自存焉

大田多稼既種既戒既備乃事以我覃耜俶載南畝播  
厥百穀既庭且碩曾孫是若既方既皂既堅既好不稂  
不莠去其螟螣及其蠹賊無害我田穰田祖有神秉畀  
炎火有渰萋萋興雨祁祁雨我公田遂及我私彼有不  
穫穰此有不斂穧彼有遺秉此有滯穗伊寡婦之利曾  
孫來止以其婦子饁彼南畝田峻至喜來方禋祀以其  
騂黑與其黍稷以享以祀以介景福

李曰論人君之盛治必以鰥寡孤獨莫不得其所為  
治而有一夫不得其所不足以為盛治也孟子曰老  
而無妻曰鰥老而無夫曰寡老而無子曰獨幼而無  
父曰孤此四者天下之窮民而無告者也文王發政  
施仁必先斯四者則天下可使無窮民如堯舜之時  
矣觀文王之仁政耕者九一仕者世祿關市譏而不  
征澤梁無禁罪人不孥此周文王之仁政也然必先  
以鰥寡孤獨各得其所然後可以見文王之世於斯

為盛不可以有加矣成王遵文王之法故鰥寡能以  
自存至幽王之時則文王之道於是乎廢大田之詩  
所以作也大田多稼惟大田然後多稼既是大田則  
當預備其種戒田器記季冬之月令告民出五種命  
農計耦耕事修耒耜具田器此之謂既種既戒惟其  
既種既戒則田事無不備矣然後以我之利器始有  
事於南畝於是百穀之生既庭而直又碩而大凡民  
之所以勤於農功如是者則以魯孫是若故也言民

皆順魯孫之意王氏以謂不違農時毛氏之意亦然  
不如蘇氏以為順成王之所欲也既方既皐言百穀  
之生也方房也以其孚甲盡生房矣盡成實矣皐者  
成實也則雖成實而未堅也既而又堅又好糧童梁  
也莠似苗也國語注云莠似稷而無實所以亂苗也  
故孔子曰惡莠之亂苗而不稂不莠非其種也除而  
去之則嘉穀於是乎長矣去其螟螣及其蠹賊毛氏  
曰食心曰螟食葉曰螣食根曰蠹食節曰賊其說本

於爾雅說文以謂吏胥犯法則為蠹謂抵取民財則曰賊去螟螣蟲賊皆本於王者之政自古賢太守之治猶能使蝗不入境況王者之治人事既盡則天應於上宜其螟螣蟲賊不生也無害我田穰穰幼稼也言禾之小者螟螣之害幼稼為甚故曰無害我田穰當是時也無螟螣之害故民以謂田祖之神其有靈如此持付炎火之中使自消亡也其實非田祖付之炎火之中民見其無蝗蟲之害遂歸功於田祖至唐

明皇之時天下大旱蝗姚崇為相遂遣捕蝗使乃引  
此以為說其實與此詩異也古者無蝗蟲之災以此  
之功歸於田祖言田祖秉付炎火之中明皇既遭蝗  
蟲為宰相者宜勤其修德乃區區於捕蝗是從事於  
末也昧詩人之意遂為姚元崇之捕蝗況託儒者為  
姦乎有渰萋萋陸農師曰渰雨雲傳曰雨雲水氣也  
毛氏曰雲興貌惟其雲萋萋故雨祁祁王氏曰雲欲  
盛盛則雨雨欲徐徐則入土也雨我公田遂及我私

此見民愛上心也惟天之降雨豈有先公而後私哉  
但以民之愛其上故欲其先公田而後私也故曰雨  
我公田遂及我私上之人又愛其民也則曰駿發爾  
私終三十里君民之情相愛如此安得不享豐年之  
樂也天之降雨既欲其先公後私則知其趨事於南  
畝先公後私可知也彼有不穫穉彼處有不穫刈之  
穉禾此處有不收斂之穉束又彼處有遺餘之秉把  
此處有滯漏之禾穗蓋田主不暇收取所以遺寡婦



之利也序言矜寡不能以自存惟其如此矜寡所以  
自存也左傳曰或取以秉耜焉與周禮地官云門閭  
之委積以養老孤王制云鰥寡孤獨天民之窮而無  
告者也皆有常餼在上則有常餼在下則有遺秉滯  
穗此所以各得其所也曾孫來止以其婦子饁彼南  
畝田畯至喜甫田亦有此語所以省耕也此詩所言  
所以省斂也孟子曰春省耕而補不足秋省斂而助  
不給省耕斂二事皆當及其時古人所謂刈禾如寇

盜之至故人君於秋成之時而省斂欲其及時也來  
方禋祀成王之來也四方各致其禋祀與其騂色之  
牛及其黍稷各隨其方而祀之周禮大宗伯皆有牲  
幣各放其器之色惟其享祀如此故能助萬福焉蘇  
氏以謂騂黑但言其略也王氏則謂來方禋祀則禋  
祀四方而已以享以祀以徧於羣神亦不必如此分  
別也

瞻彼洛矣刺幽王也思古明王能爵命諸侯賞善罰惡

焉

瞻彼洛矣維水泱泱君子至止福祿如茨韎韐有奭以  
作六師瞻彼洛矣維水泱泱君子至止韎琫有珌君子  
萬年保其家室瞻彼洛矣維水泱泱君子至止福祿既  
同君子萬年保其家邦

李曰幽王之時不能正其賞罰以勸懲諸侯故君子  
思古之明王能如此則刺當時之不能也詩之所言  
只言爵命諸侯初無賞罰之事而序乃以謂賞善罰

惡者此特其文勢相連爾如大田之詩言寡婦而序詩者便以為矜寡詩人之言類如此者多矣洛水有二其一在宗周其二在東都在宗周則周官職方氏所謂河西曰雍州其浸渭洛是也在東都則書康誥所謂周公初基作新大邑于東國洛是也故瞻彼洛矣鄭氏以謂在宗周王氏以謂在東都此說皆通蓋宗周者諸侯所會之地而東都者宣王亦會諸侯於此亦是諸侯所會之地此二說所以皆通也至其義

則不然鄭氏曰我視彼洛水灌溉以時其澤浸潤以成嘉穀王氏則曰決決適中之水也水善利萬物然非適中則或為害而蘇氏之說尤為支離其說曰洛之水決決而無窮使洛愛其水無所澤萬物於洛無加也而物失其利洛惟不愛其水故無損於洛而物蒙其益此皆就洛水求義不如陳少南之說為簡徑少南曰漆沮之水流入洛宗周在焉蓋此只言諸侯之朝指洛水所在之處以見所經歷之地也君子至

止福祿如茨言君子之至於此也王則錫之以福祿其多如蓋室之茨也韎韐有奭以作六師鄭氏則以諸侯世子除三年之喪服士服而來未遇爵命之時時有征伐之事天子以其賢任為軍將使代卿士將六軍而出韎韐者茅蒐染也茅蒐韎韐聲也韎韐祭服之韠合韋為之其服爵弁服紂衣纁裳也而王氏則謂使服韎韐之韐而作六師則以討有罪故也使君子討有罪則所謂能罰惡也周官凡有兵事韋弁

服先儒以為左傳所謂韎韁之跗注是也惟古人以  
韎韁之服為征伐之服則此下文曰以作六師而其  
上文曰韎韁有奭則其為征伐之服無疑矣毛鄭則  
以為祭服不如王氏之說為長夫諸侯之朝於天子  
天子則使之服韎韁之服以作六師則其寵任之志  
可知矣奭赤貌也鞞容刀鞞也古之言鞞猶今之言  
鞘也琫上飾韞公二年藻率鞞韞杜預注以謂鞞佩  
刀削上飾韞下飾與此不同要之此二物者皆是佩

刀鞘之飾而其上下則不可得而知也韞琫有珌此王者所以錫諸侯也王者既以錫諸侯諸侯得事則可以萬年保其家室也福祿既同蘇氏曰言與諸侯共之也王氏則曰惟能賞善則善者衆善者衆則莫或為惡故福祿既同亦並受其福之意王氏之說不如蘇氏之說為明白君子萬年保其家邦亦上章之意也

裳裳者華刺幽王也古之仕者世祿小人在位則讒譎



並進弃賢者之類絕功臣之世焉

裳裳者華其葉湑兮我覲之子我心寫兮我心寫兮是以有譽處兮裳裳者華芸其黃矣我覲之子維其有章矣維其有章矣是以有慶矣裳裳者華或黃或白我覲之子乘其四駱乘其四駱六轡沃若左之左之君子宜之右之右之君子有之維其有之是以似之

李曰昔者文王之治岐也仕者世祿則知古者世官為可信也然武王數紂之罪則曰官人以世春秋書

尹氏卒譏世卿者也蓋古者世祿不世官世祿者但指其功臣而言之世官則無賢不肖皆以官寵之恐為民害也此世祿世官之所以不同也楚令尹子文之子箴尹克黃使於齊王思子文之治楚國也曰子文無後何以勸善使復其所改命曰生晉叔向之弟獲罪祈奚曰叔向社稷之衛將十世宥之以勸能者古者重功臣之世如此而幽王弃之可乎裳裳猶堂堂也滑葉盛貌鄭氏曰華堂堂於上喻君也葉滑然

於下喻臣也按此詩只說賢者之類而乃以華喻君其說為不類此但言賢者之類昌盛如此故我見此子則傾寫其心以與之傾寫其心以與之是以其國有美譽而得其安處矣芸黃亦所以喻賢者之類惟賢者之昌盛如此故我見此子則粲粲然有文以接之有文以接之是以有慶賜也或黃或白既以黃為喻賢者之昌盛則白者乃其見弃也惟賢者不當見弃故我見之則有四馬六轡之文沃然而美左之右

之此末章則言賢者之德以左之則無所不宜以右之則又君子之所當有蓋以見置之左右無所不可也惟其如此則似之續之永永而不絕乃其宜也今幽王乃以讒言而弃之可乎

桑扈刺幽王也君臣上下動無禮文焉

交交桑扈有鶯其羽君子樂胥受天之祜交交桑扈有鶯其領君子樂胥萬邦之屏之翰百辟為憲不戢不難受福不那兕觥其觶旨酒思柔彼交匪敖萬福來

求

李曰幽王之時君臣之舉措皆無禮文故詩人陳古  
之有禮文者以刺之如大田甫田瞻彼洛矣等詩皆  
是陳古以刺今也然以此詩觀之徒見稱美古人之  
德安知其為刺詩乎故李祭酒曰楚茨大田之什並  
陳成王德之善行露汝墳之篇皆述紂時德之惡汝  
墳為王者之風楚茨為刺過之雅太師曉其作意知  
其本情故也此說為善蓋詩之辭雖善而以音雅推

之則知其為刺詩詩之辭雖不善而以音雅推之則知其為美詩此所以審聲以知音審音以知樂審樂以知政不然季札之觀周樂也何以知古人之盛衰列國之興亡哉交交桑扈有鶯其羽桑扈有二種如爾雅曰桑扈竊脂鴉鵲剖葦此一種也桑扈竊脂棘扈竊丹此一種也對剖葦言之則竊脂者竊其肉也對竊丹言之則竊脂者竊其色也爾雅有竊毛皆謂淺色竊脂淺白也交交桑扈有鶯其羽者正以其色

之竊脂者言之此則陸農師之說也交交往來也言  
桑扈之往來鶯然而有文也鳥之有文章正猶人之  
有禮文也人而無禮文則桑扈之不如也君子樂胥  
受天之祐毛氏曰胥皆也鄭氏曰有才知名也鄭  
氏之說為曲賈誼亦曰君子樂胥胥相也樂民之樂  
者民亦樂其樂憂民之憂者民亦憂其憂賈誼以胥  
為相正與王氏同王氏曰君子所以相樂者以其有  
粲然之文以相接文以相接則達於暴亂豈特人所

善哉天祐之矣王氏之說亦如毛氏之說今當用之  
惟君子能與臣下相樂則天祐之矣故曰受天之祐  
夫所謂樂者豈其任情而行流連而忘返哉盖有法  
度存于其間也觀其末章則可以見其和樂而不流  
矣領頌也君子樂胥萬邦之屏君子能和樂則可以  
屏蔽萬邦矣惟其能屏蔽萬邦為國楨榦則四方諸  
侯亦當法其所為故曰之屏之翰百辟為憲原其所  
以至此者則其禮法自戢歛自畏難也如不戢斂不



畏難安能受福如此之多邪故曰不戢不難受福不  
那那多也兕觥其觥兕觥罰爵也古之王者致罰爵  
以罰其失禮今也君臣上下動有禮文則雖有罰爵  
亦觥然而不用其所以不用者以其旨酒而思和柔  
也夫旨酒禹之所以惡者以其能亂人也今也以旨  
酒而思柔則足以見其不為酒所亂也惟其如此是  
以交際之間無有傲慢故我雖無求於福而福自求  
於我也觀幽王之時如賓之初筵之詩見其君臣於

宴飲之間傲慢失禮無所不至如賓既醉止載號載  
呶亂我籩豆屢舞傲傲觀此四句想其樽豆之間傲  
慢輕侮無所忌憚則雖有罰爵亦不勝其罰矣此桑  
扈之詩所以刺之也若夫先王之時則禮教素行如  
湛露之詩燕同姓之詩也而皆恭儉無有失禮如曰  
莫不令德則無有失德者矣如曰莫不令儀則無有  
失儀者矣燕同姓如此則燕羣臣可知矣故以湛露  
觀之則知桑扈之思古以賓之初筵觀之則知桑扈

之傷今也

李迂仲黃實夫毛詩集解卷二十七

謹案卷二十六第二十二頁前四行下二章皆此  
意刊本二訛三今改

第二十二頁後一行似未可行也刊本似訛是今  
改

卷二十七第四頁後七行孔明下治也刊本下訛  
卞今改

第十一頁後二行清謂玄酒也酒鬱鬯五齊三酒  
也刊本作清酒玄酒也攷鄭箋上句釋清下句

釋酒二字分注若作清酒玄酒也則下句為贅  
今據改

第十三頁後五行如茨如梁刊本茨訛坻據經改  
第二十二頁前八行秋省斂而助不給刊本給訛  
及據孟子改



欽定四庫全書

覆校官助教臣吳省蘭

校對官編修臣朱依魯

謄錄監生臣王元勛

謄錄監生臣李本

欽定四庫全書薈要

經部

毛詩李黃集解卷二十八  
九





欽定四庫全書薈要卷八百八十八

經部

毛詩集解卷二十八

宋 李樗黃榘 撰

鴛鴦刺幽王也思古明王交於萬物有道自奉養有節

鴛鴦馬于飛畢之羅之君子萬年福祿宜之鴛鴦在梁戢

其左翼君子萬年宜其遐福乘馬在廐摧之秣之君子  
萬年福祿艾之乘馬在廐秣之摧之君子萬年福祿綏  
之

孝曰交於萬物有道所謂畢之羅之是也自奉養有節所謂秣之摧之是也鴛鴦匹鳥也孔氏曰自古太平之時交於萬物有道欲取鴛鴦之鳥必待其長大於其能飛乃畢掩而羅取之不於幼小而暴夭之也王氏曰於其飛然後畢之羅之則不取其卵弋不射宿故也孔氏則專以謂不取其幼小王氏則兼以謂弋不射宿二說皆通然一章則曰畢之羅之二章則曰鴛鴦在梁戢其左翼故歐氏曰鄭氏謂明王之時

人不驚駭而自若無恐懼然則人不驚駭與遭畢羅  
二章義正相反而鄭皆謂明王之時理豈得通此亦  
不然夫明王之世必俟其飛而後取之故其在梁者  
則戢翼而安此章正與上章文意相承安得謂之相  
反者哉必曰戢其左翼者陸農師曰凡鳥左顧則怒  
作右眄則喜生飛而起則仰左翼飛而下則仰右翼  
故今鷺鳥下擊皆先側左翅也乘馬在廐摧之秣之  
言馬之在牧者不用其力則委之以摧馬之在廐者

則用之則加之以秣此亦見君子愛國用如此也推是將生芻以養馬秣是將粟以養馬鄭氏曰齊而後三舉設盛饌恒日則減焉此之謂有節也惟古之明王交於萬物有道自奉養有節故君子享萬年而受其福祿也甚宜蘇氏曰艾老也言以福祿終其身也王氏曰此詩三言福祿而於鴛鴦在梁戢其左翼獨曰遐福者君子之於物取有時用有節所以宜其祿而福之遐尤在乎使萬物得其性也此則鑒說矣歐

氏曰馬無事則委之以莖有事則予之以穀此前世  
中才常主之所能為不足當詩人思古而詠歎此亦  
不然也詩人但以秣馬之事觸類而長之則見其愛  
國用皆然也不可泥榘秣以為說也善學者當通倫  
類如弋不射宿此何足以見孔子之仁哉自弋不射  
宿而觀之則其實可知矣故子與人歌而善必使反  
之而後和之此只是歌者之善孔子何為而與之哉  
歌者尚如此則足以見夫子與人為善也且如此詩

只言鴛鴦而序詩者便以為明王交萬物有道但以鴛鴦而觸類則見其交萬物有道皆然也此學詩者之法也

頍弁諸公刺幽王也暴戾無親不能宴樂同姓親睦九族孤危將亡故作是詩也

有頍者弁實維伊何爾酒既旨爾殽既嘉宣伊異人兄弟匪他薦與女蘿施于松柏未見君子憂心弈弈既見君子庶幾說懌有頍者弁實維何期爾酒既旨爾殽既

時豈伊異人兄弟具來薦與女蘿施于松上未見君子  
憂心忉忉既見君子庶幾有臧有頍者弁實維在首爾  
酒既旨爾殽既阜豈伊異人兄弟甥舅如彼雨雪先集  
維霰死喪無日無幾相見樂酒今夕君子維宴

李曰諸公謂同姓之親也幽王不能親其同姓則同  
姓之人亦莫肯親於幽王此所以知其孤危將亡也  
頍弁貌說文曰舉頭貌鄭氏曰幽王服是皮弁之冠  
是維何為乎言其宜以宴而莫為也蘇氏曰彼所謂

弁者實何物哉徒以人加之首而貴之耳今王豈謂  
我自貴而忽兄弟哉蘇氏則以此為譬喻鄭氏則以  
為王服皮弁之服不如從鄭氏之言為簡徑蓋言幽  
王既服皮弁之服而又有酒之清有殽之美何為不  
與兄弟而宴樂之哉其所宴非有踈遠之人也惟兄  
弟而已非有他人也何為不與之宴哉王氏曰宣伊  
異人兄弟匪他者非異人而兄弟也而兄弟又非有  
他則宜與之宴樂矣有他謂若周之管蔡然王雖欲



與之宴樂不得也今匪有他而不能與之宴樂則其  
咎在王矣此蓋強為之說也此但言兄弟非有他人  
者也不過如此而已蔦與女蘿蔦寄生也女蘿菟絲  
松蘿也此二物者皆在於松柏之上松柏存則托之  
以固松柏隕亦隨以亡亦猶吾之兄弟托生以存亡  
故我見王則可以悅懌不見王則心之憂弈弈然而  
不安王何為而不顧我哉何期鄭氏曰猶伊何也時  
善也具來言其皆來也而其意與上章同有類者弁

實維在首阜多也兄弟甥舅也如彼雨雪先集維霰  
雨雪說文曰稷雪也陸農師以為米雪言雪散亦如  
米所謂稷雪義蓋如此鄭氏曰喻幽王不親九族亦  
有漸自微至甚如先霰而後大雪鄭氏以為不然其  
說曰考詩之意非謂不親九族有漸所謂其危亡有  
漸也國將亡必先離其九族如雪將下必先下霰下  
霰必知雪見九族離必知國亡必然之理也今當用  
之惟知其將亡故曰死喪無日能復幾何得見乎苟

今夕有酒則當以相宴不恤其他也此皆是旦不保  
暮之辭也如伐木之詩曰伐木許許釃酒有藇既有  
肥羜以速諸父寧適不來微我弗顧則其燕諸父可  
謂厚矣又曰於餐洒埽陳饋八簋既有肥牡以速諸  
舅寧適不來微我有咎則其燕諸舅亦可謂厚矣夫  
周之先世其所以燕甥舅也如此惟恐其獲戾於諸  
舅也又如此則其親親之意可知矣今幽王不能繼  
文武之業王之同姓諸侯所以望王者如此之切而

王乃以路人待之則其與文武之心何其相遠也宋  
華亥與寺人柳比而逐合比代其右師左師曰女夫  
也必亡女喪而宗室於人何有人亦於女何有周之  
盛也封建親戚以藩屏周故同姓親之今幽王之所  
親者既不之親則王之宗族就有親於王哉蓋國家  
之亡必先自於九族之離孟子曰多助之至天下順  
之寡助之至親戚叛之紂之亡也其親莫如微子且  
親抱祭器而入周項羽之亡其親莫如項伯而泄其

謀以助漢此所謂親戚叛之也夫親戚所以叛之者  
亦必有以致之耳不能親睦九族則其孤危將亡也  
必矣

車牽大夫刺幽王也褒似嫉妬無道並進讒巧敗國德  
澤不加於民周人思得賢女以配君子故作是詩也

間闕車之牽兮思變季女逝兮匪饑匪渴德音來括雖  
無好友式燕且喜依彼平林有集維鷦辰彼碩女令德  
來教式燕且譽好爾無射雖無旨酒式飲庶幾雖無嘉

散式食庶幾雖無德與女式歌且舞陟彼高岡析其柞  
薪析其柞薪其葉湑兮鮮我覲爾我心寫兮高山仰止  
景行行止四牡騑騑六轡如琴覲爾新昏以慰我心

李曰褒姒嫉妬無道並進於十月之交可以見皇父  
為卿士番維為司徒家伯為宰仲允膳夫聚子內史  
樛維師氏豔妻嬭方處蓋褒姒既已用事則小人得  
以並進故無道之徒得以羣聚於朝肆為讒巧敗其  
國家而民受其禍故周人思得賢女以配王欲其改

過而作是詩漢王莽傳曰間闕漸臺顏師古注曰間  
闕猶崎嶇展轉也然以此詩觀之則與王莽傳又不  
同故此多從毛氏之說曰間闕設牽也言設此車牽  
之間闕而思得變然之季女乘之往來我之思也非  
謂飢而思食渴而思飲也其所欲者乃思賢女以德  
音來會於此也王氏曰牽之在車間以固之闕以通  
之然後足以與行賢女之配君子貞以固之順以通  
之如牽之在車故因興焉此則強為之說也雖無好

友式燕且喜蘇氏曰雖無好友以事王姑以奉王燕  
喜之樂猶愈於小人也此說是也歐氏曰彼所思之  
女雖無衆妾與相好友祇得一人亦足以承王燕喜  
也此亦是一說今當且從蘇氏之說依彼平林有集  
惟鷓鴣雉也依茂木貌言平林之木依然而茂則雉  
必先集於下時有賢女以為后則衆妾之有令德者  
皆來化其善行以與王燕樂則我心愛之而思無厭  
斂也雖無旨酒式飲庶幾歐氏曰此思賢女而不可



得之辭也蓋言雖無旨酒但得飲可也雖無嘉穀但  
得食可也雖無賢女以德及汝但得與王宴樂之猶  
勝於嬖后也陟彼高岡言我陟彼高山之脊析去其  
柞薪其所以析薪者以其葉之盛也亦猶褒姒在王  
之側所以蔽王之耳目也必當去之可也今王能去  
之使可得見則我憂心得寫也鮮之為言善也言善  
乎我得見之矣高山仰止此章則歎賢女之行也景  
大也大行之可行亦猶高山之可仰也其為人所歎

慕如此故我欲具此四牡之馬駢駢然而調其六轡  
之如琴然為王聘此女以為王之新昏我得見之則  
可以慰我心也嘗觀此詩正與東門之池詩同意東  
門之池可以漚麻彼美淑姬可以晤歌蓋言以賢女  
而配君子亦猶以水而漚麻自然薰陶漸漬以使王  
為善也蓋自古國家之亂必自內寵始內寵既已用  
事則小人乘利而進故有褒姒則有皇父之徒有楊  
妃則有李林甫之徒內寵用事而加以小人欲其國

之不亡不可得也賢妃在內而君子在朝欲國之不興亦不可得也周南召南之詩皆文王之治有以刑于寡妻如文王之德雖不待於內助可也然猶賴后妃以成關雎之治況下於文王者乎

青蠅大夫刺幽王也

營營青蠅止于樊豈弟君子無信讒言營營青蠅止于棘讒人罔極交亂四國營營青蠅止于榛讒人罔極構我二人

李曰歐陽公云青蠅之汚黑白不獨鄭氏之說前世  
儒者亦多見於文字今之青蠅所汚甚小以黑點白  
猶或有之至於變白為黑青蠅則未嘗有之遂以鄭  
氏汚白使黑汚黑使白為非而其說則曰如齊風雞  
鳴之篇古人取其飛聲之衆可以亂聽猶今所謂聚  
蚊成雷也然此二說皆通青蠅能變白為黑亦可譬  
讒人之言能變亂是非但去其汚黑使白之說亦無  
害也段灰曰青蠅糞猶足敗物雖玉猶不免所謂青

蠅點玉也若以青蠅能亂人之聽亦可譬讒人之能亂君之耳目也其曰營營者毛氏則曰往來貌說文則曰小聲二說皆通止于樊鄭氏曰欲外之令遠物也蓋欲止于藩籬之外而使不得入也其曰榛曰棘者皆所以為藩也王氏曰以譬其入之有漸此蓋強為之說也惟青蠅欲其止於藩籬之外又告之以樂易君子不可以讒言為惑也人君苟信之則讒言日至交亂四方而無所不至也構我二人唐孔氏曰二

人者人君與見讒之人也幽王之時讒人用事可謂  
衆矣豈獨構我二人哉如小弁之詩則太子之傷於  
讒也巧言之詩則大夫之傷於讒也巷伯之詩則寺  
人之傷於讒也當是時小人得志凡曰賢者無不被  
讒矣而獨曰構我二人者蓋主見讒者而言也

賓之初筵衛武公刺時也幽王荒廢媒近小人飲酒無  
度天下化之君臣上下沈湎淫液武公既入而作是詩  
也

賓之初筵左右秩秩邊豆有楚殽核維旅酒既和旨飲  
酒孔偕鐘鼓既設舉疇逸逸大侯既抗弓矢斯張射夫  
既同獻爾發功發彼有的以祈爾爵籥舞笙鼓樂既和  
奏烝衎烈祖以洽百禮百禮既至有壬有林錫爾純嘏  
子孫其湛其湛曰樂各奏爾能賓載手仇室人入又酌  
彼康爵以奏爾時賓之初筵溫溫其恭其未醉止威儀  
反反曰既醉止威儀幡幡舍其坐遷屢舞僂僂其未醉  
止威儀抑抑曰既醉止威儀忼忼是曰既醉不知其秩

賓既醉止載號載呶亂我邊豆屢舞僛僛是曰既醉不  
知其邇側弁之俄屢舞僛僛既醉而出並受其福醉而  
不出是謂伐德飲酒孔嘉維其令儀凡此飲酒或醉或  
否既立之監或佐之史彼醉不減不醉反恥式勿從謂  
無俾大怠匪言勿言匪由勿語由醉之言俾出童蒙三  
爵不識矧敢多又

李曰此詩言幽王荒廢其政教親近小人日夜為荒  
恣之行朝廷之上既如此故天下化之君臣上下並



為沈湎淫液蓋上有所好下必有甚焉者武公始相  
見其如此故作是詩以刺之幽王之時則衛武公入  
相平王之時鄭武公入相淇奥之詩曰有文章又能  
聽其規諫以禮自防故能入相於周則知衛武公之  
入相也必有興周家之治也緇衣之詩曰父子並為  
周司徒善於其職國人宜之以明有國善善之功焉  
則鄭武公之入相必有興周家之治也然幽王則有  
驪山之禍平王東遷卒不能復文武之舊者非二公

罪也蓋上之人不能聽其言爾觀此衛武公之詩則幽王不能聽言可知矣衛武公如此則鄭武公可知矣此篇鄭氏蘇氏毛氏王氏皆以為先王將祭必大射以擇士將射必先行燕禮歐陽則以為不然以謂若如鄭氏之說則是一日之內朝為得禮之賢君暮為淫液之昏主此豈近於人情哉遂以此詩上二章略陳昔之人君與其臣下飲酒必賓主秩秩然肅恭下二章遂刺王之上下飲酒既失威儀又號呶離亂

籩豆亦無次序當從歐氏之說蓋此篇首既曰賓之初筵三章又曰賓之初筵首章言賓之初筵者古之飲酒其禮如此而飲酒之後亦如此也三章言賓之初筵者言幽王之飲酒其禮如此而飲酒之後不如也言古之人君其飲酒也賓主分為左右秩秩然而有序其籩豆之屬則楚然而陳列殽豆實也核加籩桃梅之屬也籩以竹為之豆以木為之籩貯桃梅豆貯殽饌旅陳也殽核維旅言以殽核之屬陳於籩

豆之中也其主人之酒則調和而旨矣而飲酒之人又偕齊順禮無有諠譁之失禮矣而其飲酒之時則設鐘鼓以為樂古之宴飲又有金奏者左傳所謂金奏作於下是也鐘鼓既設矣而舉其相醕之爵逸逸然往來有次序也然其君臣不獨飲酒而已又將或射周旋揖遜因其勝負以相爵大侯王所射之侯也射張皮謂之侯二尺作中四尺者曰鵠鵠中二尺曰正正中四寸曰質或謂之鵠也抗舉也王氏曰大侯

抗則餘侯從之矣大侯既抗弓矢斯張而其衆射之  
夫同登而射齊獻爾發矢中的之功彼射者之發的  
也凡以求爾爵而已的質也爵射爵也籥舞笙鼓此  
章言古人飲酒或因祭先祖而飲也詩曰左手執籥  
者所執而舞也秉籥而舞與笙鼓相應樂既和而具  
奏以爲進而衍樂其先祖於是洽其百禮之人也百  
禮謂助祭之人也助祭之人所至有壬者任事也鄭  
氏謂任卿大夫也林國君也然以任爲卿大夫以林

為國君其說難通不如以壬為大也林為盛也言其禮之盛大如此神於是賜以大福使其子孫皆如今日之樂也祭既畢矣則歸賓客之俎留同姓以與之宴樂故祭樂皆入各奏其能其燕賓皆取其匹主人皆入而與之共射則酌其爵以安之而奏其時物也手取也仇匹也室人主人也三章則言幽王之飲酒不如古矣方其初也非不溫然而恭也蓋方其未醉也則反反重而慎至旅醺之時及其既醉也則幡幡

然而失其所已無復昔之威儀矣至於舍其坐而遷徙數數起舞僂僂然而失禮此言其醉中之狀也方其未醉也則威儀抑抑然而慎密及其既醉也則怵怵然而媒嫚蓋其既醉則不如其常也此皆言其昏亂也賓既醉止載號載呶錯亂我籩豆之列則數數起舞僂僂然而不正異乎前章之所謂籩豆有楚穀核維旅蓋其既醉則不自知其過尤也其醉中之狀方且傾側其弁數數起舞僂僂然而不止於是武公

作此詩以數之既醉而出以下者皆是武公誨之之辭也言既醉而出則可以受福言得禮也醉而不出則是誅伐其德也王若飲酒而盡善則可為令儀矣王何不為哉凡此飲酒此言凡人之飲酒豈盡皆醉哉有醉者有不醉者王則立其監以督之又立史以佐之蓋欲罰其不飲而使之皆醉也昔日以醉為不善今日則以不醉為恥言臣下化之也古者設兕觥以罰其醉而失禮者今則立監佐史獨罰其不醉者



則其相去也遠矣今亦勿從而謂之無俾其怠慢於此不可言則不當言無所從來則勿語苟不能如此而由醉中出言則是使出童毀也童無角也毀未有無角者今曰童毀者醉中之言以無為有也夫人三爵之後已昏然無所識矣況又多乎哉言其不可過也

論曰蘇黃門曰養生之人深自覆護擁閉無戰鬪急亡之患而卒至於不壽者何邪是酒奪之也力田之

人倉廩富矣而俄至於饑寒者何邪是酒困之也服食之人乳藥餌石無風雨暴露之苦而常至於不寧者何邪是酒病之也修身之人帶鉤蹈矩不敢妄行而常至於失德者何邪是酒亂之也夫修身之人一為酒之所亂則迷然不恭忘其所以修身者故古人謂酒不敢過恐其亂德也昔齊敬仲飲桓公酒樂公曰以火繼之對曰臣卜其晝未卜其夜不敢君子曰酒以成禮不繼以淫義也夫以齊桓春秋之時猶如

此古之人自可知也昔武王數紂之罪亦曰沈湎肆  
虐臣下化之朋家作仇脅權相滅蓋言紂為長夜之  
飲沈湎於酒而臣下化之也至於厲王沈湎於酒厥  
愆爾止至於如蜩如蟬如沸如羹小大近喪人尚乎  
由行則天下化之也故蕩之詩每章則以咨爾殷商  
為言厲王之惡與紂同也今幽王之所為又與厲王  
同出於覆車之轍觀此三君皆以酒而臣下化之則  
後之人君可不戒哉

魚藻之什詒訓傳第二十二

魚藻刺幽王也言萬物失其性王居鎬京將不能以自樂故君子思古之武王焉

魚在在藻有頌其首王在在鎬宣樂飲酒魚在在藻有萃其尾王在在鎬飲酒樂宣魚在在藻依于其蒲王在在鎬有那其居

李曰萬物得其性則人君亦得共享其樂萬物失其性則人君欲以自樂有所不能也故詩言魚在在藻

有頌其首言萬物之得其性也而繼之以王在在鎬  
豈樂飲酒言王得以共享其樂也今幽王則不然此  
詩人所以思古而作詩也言魚何在乎在乎水中之  
藻遂得肥大故其首則頌然而大其尾則莘然而長  
又依于其蒲者則是萬物各得其性矣萬物得其性  
天下無事則王何在乎在乎鎬京之地而豈樂飲酒  
也豈樂樂易也飲酒樂豈但倒其文以便於韻爾有  
那其居那然而安也王蓋指武王也

論曰賓之初筵之詩言幽王之飲酒也此詩言武王之飲酒也夫其飲酒之一也而其美刺之不同也孟子曰文王以民力為臺為沼而民歡樂之也謂其臺曰靈臺謂其沼曰靈沼樂其有麋鹿魚鱉鳥獸也古之人與民偕樂故能樂也湯誓曰時日曷喪予及女偕亡民欲與之偕亡雖有臺池鳥獸豈能獨樂武王之飲酒乃文王之為臺為沼也幽王之飲酒乃桀之不能同樂也人君以一身託於士民之上天下安則

人君亦得而樂之天下危則人君特一匹夫耳雖欲  
歡樂豈能獨哉觀幽王者有驪山之禍則當時不能  
同樂也

采菽刺幽王也侮慢諸侯諸侯來朝不能錫命以禮數  
徵會之而無信義君子見微而思古焉

采菽采菽筐之筥之君子來朝何錫予之雖無予之路  
車乘馬又何予之玄衮及黼威沸檻泉言采其芹君子  
來朝言觀其旂其旂淠淠鸞聲嘒嘒載駟載駟君子所

屈赤芾在股邪幅在下彼交匪紓天子所予樂只君子  
天子命之樂只君子福祿申之維柞之枝其葉蓬蓬樂  
只君子殷天子之邦樂只君子萬福攸同平平左右亦  
是率從汎汎楊舟紼繩維之樂只君子天子葵之樂只  
君子福祿膺之優哉游哉亦是戾矣

李曰史記襄姒不好笑幽王欲其笑多方故不笑幽  
王為烽燧有寇至則舉燧火諸侯悉至至而無寇襄  
姒乃大笑其後數舉烽燧諸侯一不至觀此一事則



幽王好侮慢諸侯數徵會之而無信義則安得如王者錫命以禮哉鄭氏謂采菽以待諸侯此說雖無害然不如蘇說為得詩人之旨蘇氏曰采菽以為藿物至微而用至薄矣然猶設筐筥以待之況諸侯乎故古者諸侯之來朝也則曰何錫予之亦當以路車乘馬予之也然其心猶以為未也則又曰何以予之乎則曰玄衮及黼予之也玄衮謂玄衣而卷龍也黼白黑黼也雖無予之路車乘馬錫之以車馬也又何以

予之乎玄衮及黼錫之以衣服也古者天子錫諸侯  
多以車馬衣服如舜之車服以庸是也陳少南曰上  
公九章其服用袞古之諸侯豈皆上公而有是賜哉  
蓋古者諸侯之朝有上公而被其賜故詩人取其賜  
予之至厚者以刺幽王也此說是也感沸泉出貌檻  
泉正出之泉也感沸檻泉言采其芹鄭氏謂采芹以  
待君子不如蘇氏之說言感沸之清泉吾將采其芹  
來朝之君子吾將觀其旂其旂淠淠鄭氏謂觀其衣

服車乘之威儀所以為敬且省禍福也其曰觀其衣服車乘之威儀則是其曰以省禍福則非也歐陽公已辯之矣言我也既觀其旂則淠淠然而徐也又聽其鸞聲之嚶嚶然而和也又觀其馬之盛如此則是諸侯之至矣屆至也蘇氏曰駕既服而三之曰駟四之曰駟是也鄭氏曰諸侯來朝王使人迎之此則非也蓋上文既言其旂淠淠鸞聲嚶嚶故以言駟以見其諸侯之至此也赤芾在股赤芾即左氏所謂袞

冕黻珽是也邪幅即左氏所謂帶裳幅舄是也赤帶蔽膝也幅幅偏也所以自偏束也惟諸侯既服此服而來朝以交於天子無有舒緩固天子之所以予也故天子既加之錫命而又申之以福祿也維柞之枝言維柞之木日蓬蓬然而盛況諸侯能鎮天子之邦安得不如是之盛乎故其來朝也王乃錫之以福祿則諸侯不可以不答報天子也故諸侯亦辯治其國左右王室以順從天子之命此所以曰平平左右亦

是率從平平辯治也左右猶佐佑也汎汎楊舟言楊  
舟之泛泛然浮於水必有絛纜以維之亦猶諸侯之  
無常有道則來朝無道則離散王亦思有以揆之也  
厚與之福祿使之優游室家則諸侯孰不至乎隤厚  
也蘇氏曰今幽王安於逸樂而忽遺之則是亦戾王  
而已無復懷者矣按此全篇皆是思古人不應以此  
兩句為刺幽王也

角弓父兄刺幽王也不親九族而好讒佞骨肉相怨故

作是詩也

駢駢角弓翩其反矣兄弟胥姻無胥逵矣爾之逵矣民胥然矣爾之教矣民胥傲矣此令兄弟綽綽有裕不令兄弟交相為瘡民之無良相怨一方受爵不讓至于已斯亡老馬反為駒不顧其後如食宜餽如酌孔取毋教猱升木如塗塗附君子有微猷小人與屬雨雪濈濈見睨曰消莫肯下遺式居婁驕雨雪浮浮見睨曰沅如蠻如髦我是用憂

李曰頰弁之詩既刺王暴戾無親不能宴樂同姓親睦九族孤危將亡而此詩又刺幽王不親九族而好讒佞骨肉相怨則幽王親親之心亦可知也已中庸曰凡為天下國家有九經曰修身也尊賢也親親也又曰親親則諸父昆弟不怨幽王既不能親親安得而不怨乎古者親親之道尊其位重其祿同其好惡也尊其位者親之欲其貴也重其祿者愛之欲其富也同其好惡者所欲與之聚所惡勿施也幽王於是

三者不能盡安得不取怨於人乎不親九族是所當  
親而不親之也而好讒佞是所不當好而好之也中  
庸九經尊賢在於親親之上者人主惟能尊賢乃能  
親親如堯之克明俊德以親九族是也幽王不能親  
親以不能尊賢故也自古不親九族未有不因好讒  
佞之故晉獻公信驪姬而不畜羣公子楚懷王信上  
官之譖而逐屈氏單獻公所以弃其親者以好用霸  
故也周簡公所以弃其子弟者以其好用遠人故也



此數公者所好如此安得不禍乎左氏曰庸勲親親  
暱近尊賢德之大者也即聾從昧與頑用器姦之大  
者也弃德崇姦禍之大者也惟其不親九族是弃德  
者也而好讒佞是崇姦者也驪山之禍在此可卜其  
曰骨肉者唐孔氏曰以其父祖上世同稟血氣而生  
如骨肉之相附也○駢駢便利也駢其反矣言角弓  
之體往來挽則內向弛則翩然而反亦猶九族我若  
親之則彼皆內附我若疎之則彼皆離散亦如角弓

翻然而反且以武王成王之世同姓諸侯莫不內附  
非其九族皆賢也武王成王有以親之也多助之至  
天下順之武王成王是也天下猶順之而況於親戚  
乎幽王之世九族皆離散非其宗族皆不賢也幽王  
有以離之也寡助之至親戚叛之幽王是也親戚猶  
叛之而況於天下乎蓋勢之合則仇讎可使爲骨肉  
勢之離則骨肉可使爲仇讎自古然也爾之遠矣此  
章又教王之所爲如此則天下將倣之孔子曰君子

篤於親則民興於仁故堯親九族九族既睦然後協和萬邦黎民於變時雍周之文武親親以睦然後民德歸厚矣蓋上有所好下必有甚焉兄弟昏姻王苟遠之則民亦皆然矣王苟以此教民則民亦將倣之矣此令兄弟三章四章皆言民效王之所爲亦猶伐木之卒章是也綽綽寬也言兄弟相善則綽綽然有餘裕若其不善則交相爲病矣象之於舜可謂傲矣而舜不藏怒焉不宿怨焉在舜則誠爲瘡矣然非舜

之罪也惟其兄不兄弟不弟是以有呂產呂祿之輩  
交相爲惡無所不至也然民之所以至此者皆幽王  
有以教之也故至於民之無良相怨一方也言其不  
能反於其身而責於他人也是以舜之事瞽瞍信有  
罪矣而舜未嘗以罪而責於父故卒至於瞽瞍底豫  
然兄弟之道亦當如此今也無良兄之不友不自責  
其不友乃責其弟之不弟弟之不自責其不弟  
乃責其兄之不友此其所以相怨也張文潛嘗有詩

曰蝮能毒人不能斃人能捕蝮殘其類世人競惡蝮  
爲蝮人蝮相殘竟誰致不參彼已相怨方自古詩人  
以爲刺我疑人酷蝮所羞何暇區區論蝮罪觀此詩  
則相怨一方豈不相怨乎惟其相怨故分爭受爵無  
有不讓貪求不已以至於亡其身也老馬反爲駒此  
言幽王聽讒佞之言也毛鄭皆以爲王侮慢老人如  
食老者則宜令之飽如飲老者則當度其所勝之多  
少歐氏以爲不然其說曰五章六章則刺王所以不

親九族者由好讒佞而被離間也因近讒佞之人其變易是非善惡乃以老馬爲駒不顧人之在後而辨其非也謂其肆爲讒佞旁若無人也此說是也蓋老馬之於駒其別白爲甚易而乃混淆正如趙高之指鹿爲馬德儒之指野鳥爲鸞自古姦佞類皆如此以老馬爲駒曾不顧人之在後有以辨之有以見其直情徑行旁若無人如此正如貪飲食之人務爲醉飽適其意而已毋教猱升木此章則言王之所爲益長

姦佞之惡也。猱之升木，不待教而能；亦猶小人爲惡，不待教而能。幽王從而教之，則長惡不悛，讒佞之人，既如塗泥，王又加塗而附之，所貴乎王者，以其有善道故。小人皆屬附於王，不敢離間私兄弟矣。雨雪濔濔，此亦當從歐陽之說，言雨雪見日而潛消，亦猶九族見弃而亡，無日矣。濔濔，雨雪貌。見日氣也。莫肯下遺式，居婁驕言王不以恩意下及九族，而自爲驕傲矣。如蠻如髦，言王之所爲無禮義如此。此我之所憂。

也蠻南蠻也髦夷髦也王之所爲比之夷狄盖痛責之也夫夷狄無禮義所貴於中國者以其異於夷狄今幽王以中國之君而無禮義乃與夷狄同是又將何以治中國乎

菀柳刺幽王也暴虐無親而刑罰不中諸侯皆不欲朝言王者之不可朝事也

有菀者柳不尚息焉上帝甚蹈無自暱焉俾予靖之後予極焉有菀者柳不尚愒焉上帝甚蹈無自瘵焉俾予



靖之後予邁焉有鳥高飛亦傳于天彼人之心于何其  
臻曷予靖之居以凶矜

李曰孔氏以上二章次二句爲暴虐下二章及卒章  
下二句爲刑罰不中分章析句之弊一至於此此詩  
但言諸侯不肯朝王則暴虐無親刑罰不中其意自  
可見不必於詩中求之也如葛覃之序言化天下以  
婦道而詩中未嘗說及化天下婦道卷耳之詩言無  
險詖私謁之心詩中亦未嘗及此學詩者觀其意之

如何知其意則其序曉然明白此學詩者之法也苑然之柳行路之人見之豈不庶幾而止息乎今幽王之爲君而諸侯乃以爲不可朝曾苑柳之不如也尚者庶幾也不尚尚也上帝甚臨無自睽焉者此章當如歐陽公之說鄭氏以爲臨讀曰悼上帝者想之也然以上帝爲一意言幽王之暴虐不可以朝事甚使我心悼病歐氏以爲蹈動也言今天驚動我使我無自睽近之又使我安之以待其極夫以甚臨爲驚動

我則以一句爲一意然歐氏之說又不如陳少南之  
說以極爲至言上帝警動之矣我無自親近之天且  
俾我安之以待其改惡從善而後我始可以往也瘵  
病也邁往也言王苟能遷善改過而後可往也無自  
瘵焉言苟朝王適所以自病也鳥飛雖高亦必傳于  
天而後止人心所至無畔岸曾鳥之不如也蓋人心  
險於山川以見幽王之心無常不知其所止者也禮  
記曰爲人君止於仁爲人臣止於敬蓋言人君之心

有所止然後來相朝惟幽王之心未必有所止故曰  
于何其臻曷予靖之言何以使予安之者蓋居於此  
適所以取凶危之地也曰凶矜者以其凶可矜憐也  
夫諸侯之不朝固諸侯之罪幽王有以致之也宣王  
之時諸侯之朝猶曰我友敬矣讒言其興以朝王如  
此猶有讒言今幽王暴虐如此則諸侯之朝其速禍  
也宜矣

李迂仲黃實夫毛詩集解卷二十八